



ISTITUT CULTURAL LADIN  
MUSEO LADIN DE FASCIA

## COMUNICAT STAMPA

Sèn Jan, ai 23 de messèl 2019

### Museo Ladin de Fascia

## LA CIANZON DE VAL DE FASCIA

*L'identità ladina te n video musical de gran efet*

N aperitif e n autor te Museo Ladin

En lunesc ai 29 de messèl 2019 da les 17.30

N test poetich scrit del 1941 da Francesco Dezulian del Garber, desche recort pien de encresciadujum de sia doucia val de Fascia. Dapodò l'é ruà te la mans de Luigi Canori, componist da Moena, che con autertanta pascion e sentiment l lo à fat doventèr melodia. Ades parola e musega se fornesc sù con retrac ciarié de segnificat che se mesceda te n chèder dassen sugestif.

L'é con chisc ingredienc che l'é nasciù l nef prodot multimedièl de l'Istitut Cultural Ladin che vegnarà prejentà ló dal Museo Ladin en lunesc ai 29 de messèl da les 17.30.

Test, musega e retrac porta dant i elemenc che caraterisea la jent ladina de Fascia, sia identità de comunanza leèda dal cher a sie teritorie, a sia storia e a si lengaz.

La composizion se spartesc te cinch moments musicai che vegn un dò l'auter beleche en foja de suite, dessegnan na cornisc de emozions dò e dò desferentes che fèsc restèr senza fià. La maor carateristica de Fascia, sia identità ladina, vegn al luster dessema con sia capacità amò ferguscola de produjer cultura tel ciamp tant de la letradura che de la musega. L video, sotetitolà per l publich talian e forest, moscia la carateristiches ambientèles de la val viajan anter i colores da marevea de la desvaliva sajons de l'an e de la vita.

Donca dassen n biliet da vijita per i ghesc de la val, per descorig (o descorig endodanef) chesta tera no demò ti tempes e ti lesc olache ne mena l turism, ma ence, descheche disc l'autor, "lò che se pel goder pasc de paradìs, lò l'é Val de Fascia, lò l'é mie paisc".

L filmat, coi sotetitoi per talian, todesch e ingleis, l sarà da poder comprèr ló dal Museo Ladin te na belota pena USB, portèda dant e realisèda en colaborazion co l'APT de Fascia.

Info: **Museo Ladin de Fascia**

0462.760182

[museo@istladin.net](mailto:museo@istladin.net)

ISTITUT CULTURAL LADIN "majon di fascegn" – MUSEO LADIN DE FASCIA

38036 San Giovanni di Fassa / Sèn Jan (Tn)

tel. 0462 760182 – [museo@istladin.net](mailto:museo@istladin.net) – [www.istladin.net](http://www.istladin.net)